

辉煌大中华丛书

世家四

北京师联教育科学研究所 编



学苑音像出版社

图书在版编目(CIP)数据

辉煌大中华丛书/北京师联教育科学研究所编. —北京 :学苑音像出版社 2002. 3

ISBN 7 - 88050 - 271 - 8

I. 辉... II. 北... III. 历史—中国—资料 IV. L372 - 3

中国版本图书馆 CIP 数据核字(2005)第 187733 号

辉 煌 大 中 华 丛 书
北京师联教育科学研究所 编

出 版 :学苑音像出版社

印 刷 :北京密云红光印刷厂

开 本 850mmx1168mm 1/32

印 张 2800

字 数 43 000 千字

版 次 2001 年 4 月第 1 版

印 数 1 - 5 000

书 号 ISBN 7 - 88050 - 271 - 8

定 价 7740.00 元(全 774 册)

史记卷三十四

世家四 燕召公世家

召公奭与周同姓，姓姬氏。周武王之灭纣，封召公于北燕。

注 集解谯周曰：“周之支族，食邑于召，谓之召公。”索隐召者，畿内菜地。

奭始食于召，故曰召公。或说者以为文王受命，取岐周故墟周、召地分爵二公，故诗有周召二南，言皆在岐山之阳，故言南也。后武王封之北燕，在今幽州蓟县故城是也。亦以元子就封。而次子留周室代为召公。至宣王时，召穆公虎其后也。

注 集解世本曰：“居北燕。”宋忠曰：“有南燕，故云北燕。”

其在成王时，召王为三公：自陕以西，召公主之；自陕以东，周公主之。成王既幼，周公摄政，当国践祚，召公疑之，作君奭。君奭不说周公。周公乃称“汤时有伊尹，假于皇天；在太戊时，则有若伊陟、臣扈，假于上帝，巫咸治王家；在祖乙时，则有若巫贤；在武丁时，则有若甘般；

率维兹有陈，保乂有殷”。于是召公乃说。

注 集解何休曰：“陕者，盖今弘农陕县是也。”

注 集解孔安国曰：“尊之曰君，陈古以告之，故以名篇。”

注 集解马融曰：“召公以周公既摄政致太平，功配文武，不宜复列在臣位，故不说，以为周公苟贪宠也。”

注 集解孔安国曰：“伊挚佐汤，功至大天，谓致太平也。”
郑玄曰：“皇天，北极天帝也。”

注 集解孔安国曰：“伊陟、臣扈率伊尹之职，使其君不陨祖业，故至天之功不陨。巫咸治王家，言其不及二臣。”马融曰：“道至于上帝，谓奉天时也。”

郑玄曰：“上帝，太微中其所统也。”

注 集解孔安国曰：“时贤臣有如此巫贤也。贤，咸子；巫，氏也。”

注 集解孔安国曰：“高宗即位，甘般佐之。后有传说。”

注 集解徐广曰：“一无此九字。”驷案：王肃曰“循此数臣，有陈列之功，安治有殷也”。

召公之治西方，甚得兆民和。召公巡行乡邑，有棠树，决狱政事其下，自侯伯至庶人各得其所，无失职者。召公卒，而民人思召公之政，怀棠树不敢伐，哥咏之，作甘棠之诗。

注 正义今之棠梨树也。括地志云：“召伯庙在洛州寿安县西北五里。召伯听讼甘棠之下，周人思之，不伐其树，后人怀其德，因立庙，有棠在九曲城东阜上。”

自召公已下九世至惠侯。燕惠侯当周厉王奔彘，共和之时。

注 索隐并国史先失也。又自惠侯已下皆无名，亦不言属，惟昭王父子有名，盖在战国时旁见他说耳。燕四十二代有二惠侯，二厘侯，二宣侯，三桓侯，二文侯，盖国史微失本谥，故

重耳。

惠侯卒，子厘侯立。是岁，周宣王初即位。厘侯二十一年，郑桓公初封于郑。三十六年，厘侯卒，子顷侯立。

注 正义厘音僖。

顷侯二十年，周幽王淫乱，为犬戎所弑。秦始列为诸侯。

二十四年，顷侯卒，子哀侯立。哀侯二年卒，子郑侯立。

郑侯三十六年卒，子繆侯立。

注 索隐按：谥法无郑，郑或是名。

繆侯七年，而鲁隐公元年也。十八年卒，子宣侯立。宣侯十三年卒，子桓侯立。桓侯七年卒，子庄公立。

注 索隐谯周曰：“系本谓燕自宣侯已上皆父子相传无及，故系家桓侯已下并不言属，以其难明故也。”按：今系本无燕代系，宋忠依太史公书以补其阙，寻徐广作音尚引系本，盖近代始散佚耳。

注 集解徐广曰：“古史考曰世家自宣侯已下不说其属，以其难明故也。”

注 集解世本曰：“桓侯徙临易。”宋忠曰：“今河闲易县是也。”

庄公十二年，齐桓公始霸。十六年，与宋、卫共伐周惠王，惠王出奔温，立惠王弟颓为周王。十七年，郑执燕仲父而内惠王于周。二十七年，山戎来侵我，齐桓公救燕，遂北伐山戎而还。燕君送齐桓公出境，桓公因割燕所至地予燕，使燕共贡天子，如成周时职；使燕复修召公之法。三十三年卒，子襄公立。

注 集解谯周曰：“按春秋传，燕与子颓逐周惠王者，乃南燕姑姓也。世家以为北燕，失之。”索隐谯周云据左氏燕与卫伐周惠王乃是南燕姑姓，而系家以为北燕伯，故着史考云“此燕是姑姓”。今检左氏庄十九年“卫师、燕师伐周”，二十年传云“执燕仲父”，三十年“齐伐山戎”，传曰“谋山戎，以其病燕故也。”

据传文及此记，元是北燕不疑。杜君妄说仲父是南燕伯，为伐周故。且燕、卫俱是姬姓，故有伐周纳王之事；若是姑燕与卫伐周，则郑何以独伐燕而不伐卫乎？

注 正义予音与。括地志云：“燕留故城在沧州长芦县东北十七里，即齐桓公分沟割燕君所至地与燕，因筑此城，故名燕留。”

襄公二十六年，晋文公为践土之会，称伯。三十一年，秦师败于殽。三十七年，秦穆公卒。四十年，襄公卒，桓公立。

桓公十六年卒，宣公立。宣公十五年卒，昭公立。昭公十三年卒，武公立。

是岁晋灭三郟大夫。

注 索隐谯周云系家襄伯生宣伯，无桓公。今检史记，并有“桓公立十六年”，又宋忠据此史补系家亦有桓公，是允南所见本异，则是燕有三桓公也。

武公十九年卒，文公立。文公六年卒，懿公立。懿公元年，齐崔杼弑其君庄公。

四年卒，子惠公立。

惠公元年，齐高止来奔。六年，惠公多宠姬，公欲去诸大夫而立宠姬宋，大夫共诛姬宋，惠公惧，奔齐。四年，齐高偃如晋，请共伐燕，入其君。晋平公许，与齐伐燕，入惠公。

惠公至燕而死。 燕立悼公。

注 索隐宋，其名也，或作“宗”。刘氏云“其父兄为执政，故诸大夫共灭之”。

注 索隐春秋昭三年“北燕伯款奔齐”，至六年，又云“齐伐北燕”，一与此文合。左传无纳款之文，而云“将纳简公，晏子曰‘燕君不入矣’，齐遂受赂而还”。事与此乖，而又以款为简公。简公去惠公已五代，则与春秋经传不相协，未可强言也。

悼公七年卒，共公立。共公五年卒，平公立。晋公室卑，六卿始强大。平公十八年，吴王阖闾破楚入郢。十九年卒，简公立。简公十二年卒，献公立。 晋赵鞅围范、中行于朝歌。献公十二年，齐田常弑其君简公。十四年，孔子卒。

二十八年，献公卒，孝公立。

注 索隐王劭按纪年，简公后次孝公无献公。然纪年之书多是伪谬，聊记异耳。

孝公十二年，韩、魏、赵灭知伯，分其地， 三晋强。

注 索隐按纪年，智伯灭在成公二年也。

十五年，孝公卒，成公立。成公十六年卒， 愍公立。愍公三十一年卒，厘公立。 是岁，三晋列为诸侯。

注 索隐按纪年，成公名载。

注 索隐年表作“厘侯庄”。徐广云一无“庄”字。按：燕失年纪及其君名，表言“庄”者，衍字也。

注 索隐按纪年作“文公二十四年卒，简公立，十三年而

三晋命邑为诸侯”，与此不同。

厘公三十年，伐败齐于林营。厘公卒，桓公立。桓公十一年卒，文公立。是岁，秦献公卒。秦益强。

注 索隐林营，地名。一云林，地名，于林地立营，故曰林营也。

注 索隐纪年作“简公四十五年卒”，妄也。按：上简公生献公，则此当是厘，但纪年又误耳。

注 索隐系本已上文公为闵公，则“愍”与“闵”同，而上懿公之父谥文公。

文公十九年，齐威王卒。二十八年，苏秦始来见，说文公。文公予车马金帛以至赵，赵肃侯用之。因约六国，为从长。秦惠王以其女为燕太子妇。

注 正义从，足从反。长，丁丈反。

二十九年，文公卒，太子立，是为易王。

易王初立，齐宣王因燕丧伐我，取十城；苏秦说齐，使复归燕十城。十年，燕君为王。苏秦与燕文公夫人私通，惧诛，乃说王使齐为反闲，欲以乱齐。易王立十二年卒，子燕噲立。

注 索隐君即易王也。言君初以十年即称王也。上言易王者，易，谥也，后追书谥耳。

注 集解孙子兵法曰：“反闲者，因敌闲而用之者也。凡军之所欲击，城之所欲攻，人之所欲杀，必先知其守将、左右谒者、门者、舍人之姓名，令吾闲必索敌闲之来闲我者，因而利导舍之，故反闲可得用也。”正义使音所吏反。闲音纪范反。

燕噲既立，齐人杀苏秦。苏秦之在燕，与其相子之为婚，

而苏代与子之交。及苏秦死，而齐宣王复用苏代。燕哱三年，与楚、三晋攻秦，不胜而还。子之相燕，贵重，主断。苏代为齐使于燕，燕王问曰：“齐王奚如？”对曰：“必不霸。”燕王曰：“何也？”对曰：“不信其臣。”苏代欲以激燕王以尊子之也。

于是燕王大信子之。子之因遗苏代百金，而听其所使。

注 索隐按：战国策曰“子之使苏代侍质子于齐，齐使代报燕”是也。

注 正义瓚云：“秦以一溢为一金。”孟康云：“二十四两曰溢。”

鹿毛寿谓燕王：“不如以国让相子之。人之谓尧贤者，以其让天下于许由，许由不受，有让天下之名而实不失天下。今王以国让于子之，子之必不敢受，是王与尧同行也。”燕王因属国于子之，子之大重。或曰：“禹荐益，已而以启人为吏。及老，而以启人为不足任乎天下，传之于益。已而启与交党攻益，夺之。天下谓禹名传天下于益，已而实令启自取之。今王言属国于子之，而吏无非太子人者，是名属子之而实太子用事也。”王因收印自三百石吏已上而效之子之。子之南面行王事，而哱老不听政，顾为臣，国事皆决于子之。

注 集解徐广曰：“一作‘厖毛’。”又曰：“甘陵县本名厖。”索隐春秋后语“厖毛寿”，又韩子作“潘寿”。

注 索隐大重谓尊贵也。

注 索隐按：以“已”配“益”，则“益已”是伯益，而经传无其文，未知所由。或曰已，语终辞。

注 索隐人犹臣也。谓以启臣为益吏。

注 索隐此“人”亦训臣也。

注 索隐郑玄云：“郊，呈也。以印呈与子之。”

注 索隐顾犹反也。言吟反为子之臣也。有本作“愿”者，非。

三年，国大乱，百姓恟恐。将军市被与太子平谋，将攻子之。诸将谓齐愍王曰：“因而赴之，破燕必矣。”齐王因令人谓燕太子平曰：“寡人闻太子之义，将废私而立公，饬君臣之义，明父子之位。寡人之国小，不足以为先后。虽然，则唯太子所以令之。”太子因要党聚觶，将军市被围公宫，攻子之，不克。将军市被及百姓反攻太子平，将军市被死，以徇。因构难数月，死者数万，觶人恟恐，百姓离志。孟轲谓齐王曰：“今伐燕，此文、武之时，不可失也。”王因令章子将五都之兵，以因北地之觶以伐燕。士卒不战，城门不闭，燕君吟死，齐大胜。燕子之亡二年，而燕人共立太子平，是为燕昭王。[一〇]

注 索隐恟音通，痛也。恐，惧也。

注 正义人姓名。

注 正义饬音敕。

注 正义先后并去声。

注 索隐谓如武王成文王之业伐纣之时，然此语与孟子不同也。

注 集解章子，齐人，见孟子。索隐按：孟子云“章子，齐人”。

注 索隐五都齐也。按：临淄是五都之一也。

注 索隐北地齐之北边也。

注 集解徐广曰：“年表云君吟及太子相子之皆死。”驷

案：汲冢纪年曰“齐人禽子之而醢其身也”。

注 集解徐广曰：“哙立七年而死，其九年燕人共立太子平。”索隐按：上文太子平谋攻子之，而年表又云君哙及太子相子之皆死，纪年又云子之杀公子平，今此文云“立太子平，是为燕昭王”，则年表、纪年为谬也。而赵系家云武灵王闻燕乱，召公子职于韩，立以为燕王，使乐池送之，裴驷亦以此系家无赵送公子职之事，当是遥立职而送之，事竟不就，则昭王名平，非职明矣。

进退参详，是年表既误，而纪年因之而妄说耳。

燕昭王于破燕之后即位，卑身厚币以招贤者。谓郭隗曰：“齐因孤之国乱而袭破燕，孤极知燕小力少，不足以报。然诚得贤士以共国，以雪先王之耻，孤之愿也。先生视可者，得身事之。”郭隗曰：“王必欲致士，先从隗始。况贤于隗者，岂远千里哉！”于是昭王为隗改筑宫而师事之。乐毅自魏往，邹衍自齐往，剧辛自赵往，士争趋燕。燕王吊死问孤，与百姓同甘苦。

二十八年，燕国殷富，士卒乐轶轻战，于是遂以乐毅为上将军，与秦、楚、三晋合谋以伐齐。齐兵败，愍王出亡于外。燕兵独追北，入至临淄，尽取齐宝，烧其宫室宗庙。齐城之不下者，独唯聊、莒、即墨，其余皆属燕，六岁。

注 索隐按：余篇及战国策并无“聊”字。

昭王三十三年卒，子惠王立。

惠王为太子时，与乐毅有隙；及即位，疑毅，使骑劫代将。乐毅亡走赵。齐田单以即墨击败燕军，骑劫死，燕兵引归，齐悉复得其故城。愍王死于莒，乃立其子为襄王。

惠王七年卒。韩、魏、楚共伐燕。燕武成王立。

注 索隐按：赵系家惠文王二十八年，燕相成安君公孙操弑其王，乐资以为惠王也。徐广按年表，是年燕武成王元年，武成惠王子，则惠王为成安君弑明矣。此不言者，燕远，讳不告，或太史公之说疏也。

武成王七年，齐田单伐我，拔中阳。十三年，秦败赵于长平四十余万。十四年，武成王卒，子孝王立。

孝王元年，秦围邯郸者解去。三年卒，子今王喜立。

注 索隐今王犹今上也。有作“令”者，非也，按谥法无令也。

今王喜四年，秦昭王卒。燕王命相栗腹约欢赵，以五百金为赵王酒。还报燕王曰：“赵王壮者皆死长平，其孤未壮，可伐也。”王召昌国君乐闲问之。对曰：

“赵四战之国，其民习兵，不可伐。”王曰：“吾以五而伐一。”对曰：

“不可。”燕王怒，嬖臣皆以为可。卒起二军，车二千乘，栗腹将而攻鄢，卿秦攻代。唯独大夫将渠谓燕王曰：“与人通关约交，以五百金饮人之王，使者报而反攻之，不祥，兵无成功。”燕王不听，自将偏军随之。将渠引燕王绶止之曰：“王必无自往，往无成功。”王嚄之以足。将渠泣曰：“臣非以自为，为王也！”燕军至宋子，赵使廉颇将，击破栗腹于鄢。[乐乘]破卿秦(乐乘)于代。乐闲奔赵。廉颇逐之五百余里，围其国。燕人请和，赵人不许，必令将渠处和。燕相将渠以处和。赵听将渠，解燕围。

注 正义赵东邻燕，西接秦境，南错韩、魏，北连胡、貉，故言“四战”。

注 索隐谓以五人而伐一人。

注 集解徐广曰：“在常山，今曰高邑。”索隐邹氏音火各反，一音昊。

注 索隐战国策曰“廉颇以二十万遇栗腹于郃，乐乘以五万遇爱秦于代，燕人大败”，不同也。正义今代州也。战国策云“廉颇以二十万遇栗腹于郃，乐乘以五万遇庆秦于代，燕人大败”，与此不同也。

注 索隐人名姓也。一云上“卿秦”及此“将渠”者：卿，将，皆官也；秦，渠，名也。国史变文而书，遂失姓也。战国策云“爱秦”，爱是姓也，卿是其官耳。

注 集解徐广曰：“属钜鹿。”

注 集解以将渠为相。索隐谓欲令将渠处之使和也。

六年，秦灭东(西)周，置三川郡。七年，秦拔赵榆次三十七城，秦置大原郡。

九年，秦王政初即位。十年，赵使廉颇将攻繁阳，拔之。赵孝成王卒，悼襄王立。使乐乘代廉颇，廉颇不听，攻乐乘，乐乘走，廉颇奔大梁。十二年，赵使李牧攻燕，拔武遂、方城。剧辛故居赵，与庞暖善，已而亡走燕。燕见赵数困于秦，而廉颇去，令庞暖将也，欲因赵弊攻之。问剧辛，辛曰：“庞暖易与耳。”燕使剧辛将击赵，赵使庞暖击之，取燕军二万，杀剧辛。

秦拔魏二十城，置东郡。十九年，秦拔赵之邺九城。赵悼襄王卒。二十三年，太子丹质于秦，亡归燕。二十五年，秦虏灭韩王安，置颍川郡。二十七年，秦虏赵王迁，灭赵。赵公子嘉自立为代王。

注 集解徐广曰：“属魏郡。”

注 集解徐广曰：“属河闲。”

注 集解徐广曰：“属涿，有督亢亭。”

注 索隐暖音况远反。

注 正义相州邺县也。

燕见秦且灭六国，秦兵临易水，祸且至燕。太子丹阴养壮士二十人，使荆轲献督亢地图于秦，因袭刺秦王。秦王觉，杀轲，使将军王翦击燕。二十九年，秦攻拔我蓟，燕王亡，徙居辽东，斩丹以献秦。三十年，秦灭魏。

注 集解徐广曰：“出涿郡故安也。”

注 索隐徐广云：“涿有督亢亭。”地理志属广阳。然督亢之田在燕东，甚良沃，欲献秦，故画其图而献焉。

三十三年，秦拔辽东，虏燕王喜，卒灭燕。是岁，秦将王贲亦虏代王嘉。

注 正义贲音奔，王翦子。

太史公曰：召公奭可谓仁矣！甘棠且思之，况其人乎？燕（北）〔外〕迫蛮貉，内措齐、晋，崎岖强国之闲，最为弱小，几灭者数矣。然社稷血食者八九百岁，于姬姓独后亡，岂非召公之烈邪！

注 索隐措，交杂也。又作“错”，刘氏云争陌反。

【索隐述赞】召伯作相，分陕而治。人惠其德，甘棠是思。庄送霸主，惠罗宠姬。文公从赵，苏秦聘辞。易王初立，齐宣我欺。燕吟无道，禅位子之。昭王待士，思报临菑。督亢不就，卒见芟夷。